



Llywodraeth Cymru
Welsh Government

Bil Amaethyddiaeth (Cymru)

Darparu Coedwigaeth – Diwygio Deddf Coedwigaeth 1967

Egwyddorion Gweithredu

Fersiwn	Dyddiad cyhoeddi	Adran sydd wedi'i newid	Rheswm dros newid
V5 terfynol	28 Medi 2022		
V6	29 Tachwedd 2022	Datblygu canllawiau gan Cyfoeth Naturiol Cymru: paragraffau 4 a 6	Mân-gywiriad – papur ar ddulliau eisoes wedi'i dderbyn

Cyflwyniad

Mae'r canllawiau anstatudol hyn yn nodi sut mae Llywodraeth Cymru yn disgwyl i Cyfoeth Naturiol Cymru (CNC) arfer y gyfres fwy cynhwysfawr o bwerau a swyddogaethau i reoleiddio gwaith cwmpo coed a roddir iddynt drwy ddiwygiadau i Ddeddf Coedwigaeth 1967 a basiwyd drwy Fil Amaethyddiaeth (Cymru) 2022.

Pwerau

Mae Bil Amaethyddiaeth (Cymru) 2022 yn cynnwys y Ddarpariaeth Coedwigaeth a ganlyn, wedi'i grynhoi fel a ganlyn:

- diwygio Deddf Coedwigaeth 1967 (fel y'i diwygiwyd) i ganiatáu i Weinidogion Cymru ychwanegu amodau at drwyddedau cwmpo coed, ac i ganiatáu i drwyddedau gael eu diwygio, eu hatal neu eu dirymu ar ôl i drwyddedau gael eu rhoi.

Pam bod angen y diwygiadau hyn:

Ar hyn o bryd nid yw Deddf Coedwigaeth 1967 yn caniatáu ychwanegu amodau i drwyddedau cwmpo coed er mwyn sicrhau uniondeb safleoedd gwarchoddedig, rhywogaethau gwarchoddedig neu elfennau sensitif eraill o'r amgylchedd. Gallai hyn arwain at CNC yn caniatáu trwydded cwmpo coed a allai gael effaith negyddol ar yr amgylchedd a gallai fynd yn groes i ddeddfwriaeth amgylcheddol arall megis Rheoliadau Cadwraeth Cynefinoedd a Rhywogaethau 2017.

Ar hyn o bryd nid oes gan CNC bwerau i ddiwygio, atal na dirymu trwydded y mae wedi'i rhoi os daw rhywbeth am y gweithgaredd trwyddedig hwnnw yn annerbyniol. Gall hyn godi pan fo newid i berchnogaeth yn arwain at newid amcanion, neu pan fo clefydau yn effeithio ar ddewis rhywogaethau wrth ailstocio. Fodd bynnag, gall hefyd fod oherwydd cyfyngiadau ychwanegol a nodwyd ar ôl i'r drwydded gael ei rhoi megis presenoldeb rhywogaethau gwarchoddedig na ystyriwyd. Yn ogystal â hyn, gallai fod yn gysylltiedig â niwed amgylcheddol sy'n codi yn ystod gwaith cwmpo coed.

Effaith fwriadedig

Ceisir y pwerau hyn i atal cwmpo coed a fyddai'n mynd yn groes i ddeddfwriaeth amgylcheddol arall, a galluogi CNC i reoli gwaith cwmpo coed trwyddedig yn well a fyddai fel arall yn achosi niwed amgylcheddol. Effaith hyn yn bennaf yw diogelu cynefinoedd a rhywogaethau, a darparu gwarchodaeth rhag niwed amgylcheddol, er y byddai hefyd yn galluogi trwyddedau cwmpo coed i gael eu diwygio am resymau eraill fel newid yn amcanion y perchennog. Mae hefyd yn:

- galluogi gorfodi amodau "amgylcheddol" o'r fath o dan Ddeddf Coedwigaeth 1967;
- helpu Deddf 1967 i gyd-fynd â deddfwriaeth amgylcheddol arall fel Rheoliadau Cadwraeth Cynefinoedd a Rhywogaethau 2017;
- galluogi CNC i gyflawni ei ddyletswyddau eraill megis ei ddyletswydd SMNR (rheoli adnoddau naturiol yn gynaliadwy) a geir yn adran 5 o Ddeddf yr

Amgylchedd (Cymru) 2016 a'i ddyletswydd bioamrywiaeth a chydnerthed ecosystemau a geir yn adran 6 o'r un Ddeddf;

- galluogi trwyddedu coedwigaeth i gyd-fynd â chyfundrefnau rheoleiddio eraill CNC. Mae hyn yn berthnasol i'r pŵer i ddiwygio, atal a dirymu yn ogystal â'r pŵer i ychwanegu amodau at drwyddedau cwmpo coed.

O ystyried ei natur, mae risg o niwed amgylcheddol yn perthyn i waith cwmpo coed a gall olygu gorfod derbyn lefel o aflonyddwch amgylcheddol i gdnabod agweddau ymarferol rheoli coetiroedd. Wrth gymhwyso'r pwerau newydd hyn, dylai CNC gymhwyso ei ddyletswydd SMNR o dan Ddeddf yr Amgylchedd (Cymru) 2016 er mwyn sicrhau y gall coedwigoedd a choetiroedd barhau i ddarparu ystod o fanteision i ecosystemau sy'n cynnwys cynhyrchu pren yn ogystal â chadwraeth rhywogaethau a chynefinoedd gwarchoddedig, a sicrhau eu bod yn ehangu.

Mae'r Alban a Gogledd Iwerddon wedi cymryd pwerau tebyg ac mae strategaeth England Trees yn amlinellu y bydd dyletswyddau a phwerau newydd ar gyfer y Comisiwn Coedwigaeth yn cael eu hystyried, i adlewyrchu'n well gwerth cymdeithasol ac amgylcheddol coetiroedd.

Mae'r gosb gysylltiedig am gwmpo coed heb drwydded (fel y darperir ar ei chyfer yn adran 17 o Ddeddf Coedwigaeth 1967) wedi cynyddu i fod yn ffi ddiderfyn i fynd i'r afael â'r anghysondeb sy'n bodoli rhwng y gosb am gwmpo coed heb awdurdod trwydded cwmpo coed a methu â chydymffurfio â hysbysiad o dan adran 24 o Ddeddf Coedwigaeth 1967. Dylai hefyd rwystro pobl rhag cwmpo coed heb awdurdod, gan roi hyblygrwydd i'r llysoedd i gyflwyno ffioedd uwch lle bo hynny'n briodol. Mae hyn yn berthnasol i'r pwerau newydd o safbwynt nad yw unrhyw waith cwmpo coed sydd wedi digwydd yn groes i amodau amgylcheddol sy'n ymwneud yn uniongyrchol â chwmpo coed, h.y. ardaloedd sydd wedi'u cwmpo neu amseriad gwaith cwmpo coed, yn cael ei gynnal gydag awdurdod trwydded cwmpo coed ac felly gallai fod yn drosedd o dan adran 17. Byddai hyn hefyd yn berthnasol pan fo coed yn cael eu cwmpo er bod trwydded cwmpo coed wedi ei hatal neu ei dirymu o dan hysbysiad a roddwyd o dan adran 24C neu 24D o Ddeddf Coedwigaeth ddiwygiedig 1967.

Mae trosedd newydd wedi'i hychwanegu yn adran 24C i alluogi CNC i gymryd camau gorfodi pan fod "y person sy'n gyfrifol" yn methu â chymryd camau sy'n ofynnol gan hysbysiad a gyflwynir o dan adran 24C e.e. camau cywiro i fynd i'r afael ag achos o dorri amod. Mae gan hyn ddirwy ddiderfyn yn unol â'r adran 24 bresennol o'r Ddeddf.

Datblygu Canllawiau gan CNC

Gall gordefnyddio'r pwerau newydd wneud trwyddedau cwmpo coed yn rhy feichus i gael eu gweithredu'n ymarferol neu'n ariannol a gallai hynny effeithio ar y ffordd y caiff coetiroedd eu rheoli. Byddai hyn yn andwyol i weithrediad y sector coedwigaeth ac amcan Llywodraeth Cymru i ddod â mwy o goetiroedd dan reolaeth.

Mae Llywodraeth Cymru a CNC wedi ymgysylltu â grŵp o randdeiliaid allweddol sy'n cynnwys cynrychiolwyr o'r sectorau coedwigaeth, rheoli tir a chadwraeth, a sefydlwyd at y diben o roi mewnbwn i ddatblygiad ac effaith y ddarpariaeth i ddiwygio

Deddf Coedwigaeth 1967. Cododd rhanddeiliaid bryderon ynghylch CNC yn gweithredu pwerau.

Rhaid i CNC fynd i'r afael â'r pryderon hyn drwy ddatblygu canllawiau clir ar gyfer ymgeiswyr trwyddedau cwmpo coed a chanllawiau mewnol CNC er mwyn sicrhau bod dull cyson a chymesur yn cael ei gymryd i arfer y pwerau newydd. Mae angen i ymgeiswyr a deiliaid trwyddedau cwmpo coed fod yn glir o ran pryd y caiff y pwerau hyn eu defnyddio a'r hyn sy'n ofynnol. Dylai CNC barhau i gynnwys y grŵp rhanddeiliaid fel y bo'n briodol wrth ddatblygu'r canllawiau.

Mae'r papur cyfarwyddyd anstatudol hwn yn sail i bapur "dulliau" CNC sy'n rhoi amlinelliad o sut mae CNC yn bwriadu gweithredu'r pwerau hyn fel rhagarweiniad cyn cyflwyno'r canllawiau mewnol ac allanol llawn.

Dylai'r canllawiau anstatudol hyn hefyd nodi'r egwyddorion o ran sut y bydd CNC yn datblygu'r canllawiau mewnol ac allanol llawn i ymgeiswyr ar sut y byddant yn cymhwyso'r pwerau hyn, y bwriedir iddynt ddod i rym yn hydref 2023.

Mae CNC wedi rhoi cyfle i Lywodraeth Cymru weld ei bapur "dulliau" fel y gall y Llywodraeth sicrhau y bydd y ddeddfwriaeth yn cyflawni ei heffaith fwriadedig. Dylai CNC hefyd roi cyfle i Lywodraeth Cymru weld y canllawiau mewnol ac allanol llawn i ymgeiswyr a'r newidiadau sylweddol sydd i ddod yn y dyfodol, er gwybodaeth a chaniatáu amser i wneud sylwadau lle bo angen.

Dylai canllawiau (mewnol ac allanol) egluro faint o wybodaeth ategol briodol sydd angen ei chyflwyno gyda cheisiadau am drwydded cwmpo coed, a ffynhonnell yr wybodaeth honno, gan sicrhau ei bod yn gymesur ac yn angenrheidiol i'r broses gymeradwyo.

Dylai CNC sicrhau bod yr holl rhanddeiliaid, ymgeiswyr trwyddedau cwmpo coed a holl staff perthnasol CNC yn ymwybodol o'r canllawiau a'r pwerau newydd cyn iddynt ddod i rym.

Dylid adolygu gweithrediad CNC o'r pwerau o fewn 3 blynedd o gychwyn y pwerau hyn ac yn ôl yr angen wedi hynny, fel rhan o Adolygiad Ôl-weithredu Llywodraeth Cymru. Dylai CNC a Llywodraeth Cymru gytuno ar gasglu data perthnasol er mwyn monitro effaith y pwerau hyn.

Gweithredu Pwerau – Cyffredinol

Dylai'r papur "dulliau" a'r canllawiau mewnol/allanol ystyried yr egwyddorion canlynol:

Egwyddor - Mae'r pwerau hyn h.y. i ychwanegu amodau amgylcheddol ac i ddiwygio/atal/dirymu trwydded cwmpo coed sydd eisoes wedi'i chaniatáu, i'w defnyddio ar gyfer trwyddedau cwmpo coed a roddwyd *ar ôl* i'r pwerau hyn ddod i rym. Ni ellir defnyddio'r gofynion yn ôl-weithredol.

Egwyddor - Y bwriad yw defnyddio'r pwerau hyn lle mae angen clir i wneud hynny am resymau amgylcheddol. Dylai CNC ystyried a yw defnyddio'r pwerau hyn yn

angenrheidiol; yn berthnasol; y gellir gwneud hynny'n orfodol; yn fanwl gywir; ac yn rhesymol ym mhob ystyr arall, ynghyd â'i ofyniad i weithredu yn unol â Chyfraith Gyhoeddus, Cod y Rheoleiddiwr a Safonau Gwasanaeth Rheoleiddio ac Egwyddorion Rheoleiddio CNC. Dylai hyn fod yn unol â holl ddyletswyddau statudol CNC, gan gynnwys:

- ei ddyletswydd cydbwysu o dan adran 1(3A) Deddf Coedwigaeth 1967;
- ei ddyletswydd Pwrpas Cyffredinol (Rheoli Adnoddau Naturiol yn Gynaliadwy) dan Ddeddf yr Amgylchedd (Cymru) 2016;
- ei ddyletswydd bioamrywiaeth a chydnerthedd ecosystemau o dan Ddeddf yr Amgylchedd (Cymru) 2016;
- ei ddyletswyddau fel Corff Cadwraeth y DU o dan Ddeddf yr Amgylchedd Naturiol a Chymunedau Gwledig 2006.

Pŵer i ychwanegu Amodau Amgylcheddol

Mae'r diwygiadau i adran 10 o Ddeddf Coedwigaeth 1967 yn galluogi ychwanegu amodau amgylcheddol i drwyddedau cwmpo coed yn ogystal â'r amodau presennol sy'n ymwneud ag ailstocio a chynnal a chadw. Mae cymhwyso amodau priodol yn gwasanaethu i amlygu materion penodol i ddeiliad y drwydded cwmpo coed ac yn egluro'r hyn y mae CNC yn ei gwneud yn ofynnol i fynd i'r afael â'r materion hynny. Mae hefyd yn galluogi CNC i orfodi'r amodau hynny drwy gyfundrefn y drwydded cwmpo coed os nad yw'n cydymffurfio â nhw.

Egwyddor – Mae Deddf Coedwigaeth 1967, y rhoddir trwyddedau cwmpo coed oddi tani, yn ei gwneud yn ofynnol bod trawsgydymffurfio â'r holl ddeddfwriaeth berthnasol arall gan gynnwys trwyddedau amgylcheddol a rhywogaethau gwarchoddedig. Ailadroddir hyn o dan Safon Coedwigaeth y DU (UKFS). Ni ddylai defnyddio amodau geisio dyblygu neu ddisodli'r gofynion hyn: dylai deiliaid trwydded cwmpo coed barhau i gydymffurfio â'r ddau, er y gellid defnyddio amod i dynnu sylw at sensitifrwydd penodol neu niwed posibl, neu gamau angenrheidiol i'w cymryd.

Egwyddor - Dylai CNC gymhwyso amodau amgylcheddol pan fo'n briodol i amddiffyn rhywogaeth neu gynefin penodol, neu bryderon amgylcheddol eraill neu faterion o ran ansensitifrwydd sydd wedi codi yn ystod y broses ymgeisio. Dylid cymhwyso'r rhain lle maent yn briodol ac yn gymesur â'r gweithgaredd y gwneir cais amdano, a'u geirio fel eu bod yn orfodadwy ac yn berthnasol.

Egwyddor – Dylai CNC ddatblygu dull gweithredu yn seiliedig ar tua 3 'haen' o amodau yn dibynnu ar reidrwydd ac yn gysylltiedig â sensitifrwydd y safle a'r risg bosibl o niwed amgylcheddol. Dylai'r system haenau hon ddarparu dull tryloyw a chyson o gymhwyso amodau amgylcheddol, o fewn Diben Cyffredinol CNC mewn perthynas â SMNR.

Egwyddor - Rhaid i CNC drafod yr amodau amgylcheddol maen nhw'n bwriadu eu hychwanegu at drwydded cwmpo coed gyda'r ymgeisydd ac ystyried unrhyw sylwadau neu gynigion amgen mae'r ymgeisydd yn eu gwneud.

Pŵer i ddiwygio/atal/dirymu trwyddedau

Diwygio drwy gytundeb ar y cyd

Mae adran 10 o Ddeddf Coedwigaeth 1967 wedi'i diwygio hefyd i alluogi CNC a deiliad y drwydded cwmpo coed i gytuno i ddiwygio'r drwydded cwmpo coed ar unrhyw adeg. Dylai'r gallu i newid trwydded cwmpo coed mewn cytundeb ar y cyd â deiliad y drwydded helpu i fynd i'r afael â newidiadau mewn amcanion neu pan fo gwybodaeth ychwanegol wedi dod i'r amlwg ers i'r drwydded gael ei rhoi.

Egwyddor - Mae Llywodraeth Cymru yn annog CNC i ddefnyddio'r ddarpariaeth o dan adran 10 i ddiwygio'r drwydded cwmpo coed drwy gytundeb ar y cyd â deiliad y drwydded lle bo hynny'n gyson ag egwyddorion rheoleiddio a chod y rheoleiddiwr CNC, gan ddefnyddio'r darpariaethau gorfodi sydd ar gael fel dewis olaf.

Egwyddor - dylai CNC ystyried a datblygu canllawiau mewnol ac allanol priodol ar geisiadau am ddiwygiadau.

Niwed amgylcheddol

Diwygiwyd adran 24 o Ddeddf Coedwigaeth 1967 i ddarparu ar gyfer amgylchiadau pan fo amodau amgylcheddol yn cael eu torri, a rhoi pwerau i CNC amrywio, hepgor neu ychwanegu amodau newydd, neu atal neu ddirymu trwydded cwmpo coed sydd eisoes wedi ei chaniatáu. Mae diwygiadau hefyd yn darparu ar gyfer amgylchiadau pan nad yw amodau amgylcheddol wedi eu torri, ond pan fo CNC o'r farn bod cwmpo coed yn achosi niwed *sylweddol* i'r amgylchedd, neu'n debygol o wneud hynny. Yn yr amgylchiadau hyn mae'n rhoi pwerau i CNC ddiwygio, atal neu ddirymu trwydded cwmpo coed a oedd eisoes wedi'i chaniatáu.

Egwyddor - Dylai CNC ystyried a datblygu canllawiau mewnol ac allanol priodol ynghylch pryd y bydd pwerau i ddiwygio, atal neu ddirymu trwydded cwmpo coed yn cael eu hystyried.

Egwyddor – Dylai CNC ei gwneud yn ofynnol drwy ddefnyddio amodau priodol y dylai deiliad y drwydded cwmpo coed gymryd pob mesur rhesymol i sicrhau bod yr holl faterion o ran sensitifrwydd ar sail cyswllt agos hysbys ac addasrwydd cynefinoedd yn cael eu hystyried o'r cychwyn cyntaf a'u hystyried ymhellach cyn i'r gweithrediadau ddechrau a thra bod y gweithrediadau hynny ar waith. Dylai hyn fod yn gyson ag egwyddorion rheoleiddio CNC, Cod y Rheoleiddiwr a bod yn briodol ac yn gymesur. Dylai CNC fod yn ofalus i osgoi gadael i'r gofyniad hwn fynd yn rhy feichus.

Egwyddor - pan fo hysbysiad yn cael ei gyflwyno oherwydd bod amod wedi'i dorri, mae Llywodraeth Cymru yn disgwyl bod unrhyw gamau a bennir gan CNC i'w cymryd i gywiro hyn wedi eu nodi'n glir, yn rhesymol, yn gymesur ac yn darparu cyswllt clir rhwng y toriad amod a'r camau a bennir.

Egwyddor - Dylai CNC weithio gyda deiliaid trwydded cwmpo coed i gytuno ar amrywio amodau neu ddiwygio trwyddedau cwmpo coed i fynd i'r afael â niwed amgylcheddol er mwyn osgoi atal neu ddirymu lle bynnag y bo modd.

Egwyddor - Dim ond mewn amgylchiadau *eithriadol* y dylid atal neu ddirymu lle na fyddai diwygio amodau neu'r drwydded cwmpo coed yn mynd i'r afael â'r mater; neu ni ellir cytuno arno; neu lle nad oes opsiynau eraill ar gael.

Egwyddor – Rhywbeth dros dro yw atal ac mae angen dyddiad pryd fydd y cyfnod atal dros dro hwn yn dod i ben. Rhaid i hyd y cyfnod atal fod yn gymesur â'r rheswm dros y gwaharddiad ac unrhyw gamau adferol sydd eu hangen. Does dim disgwyl y bydd ataliad yn fesur tymor hir oni bai bod amgylchiadau eithriadol.

Egwyddor – Byddai Llywodraeth Cymru yn disgwyl, pan fo deiliad trwydded cwmpo coed yn cydymffurfio â'r camau a/neu'r amodau a nodir mewn hysbysiad, bod CNC yn cymryd camau i godi'r ataliad cyn gynted â phosibl oni bai bod cyfiawnhad clir dros ei gadw yn ei le drwy gydol yr hysbysiad.

Egwyddor - Lle mae trwydded yn cael ei dirymu, rhaid i CNC nodi rhesymau clir pam mai dyma'r unig ffordd sydd ar gael i atal niwed amgylcheddol.

Iawndal

Fel rhan o'r pwerau newydd, bydd y diwygiadau arfaethedig i'r Ddeddf Coedwigaeth yn caniatáu i iawndal fod ar gael pan fo trwydded cwmpo coed yn cael ei diwygio, ei hatal neu ei dirymu oherwydd niwed amgylcheddol a achosir heb unrhyw fai ar ddeiliad y drwydded. Bydd iawndal ychwanegol ar gael pan fydd hysbysiad yn cael ei gyflwyno yn ymwneud â thorri amodau, ond ei ganslo'n ddiweddarach o ganlyniad i apêl lwyddiannus.

Lle mae camau wedi'u cymryd fel gofyniad hysbysiad brys oherwydd achos o dorri amodau'r drwydded cwmpo coed sydd wedi'i ganslo yn ddiweddarach mewn apêl, bydd iawndal yn seiliedig ar gostau *gwirioneddol* a ysgwyddwyd ar ôl cyflawni'r camau hynny. Ym mhob achos arall, bydd yr iawndal yn seiliedig ar y golled o ran gwerth y pren oedd yn tyfu sy'n deillio o ddiwygio, atal neu ddirymu'r drwydded cwmpo coed. Mae hyn yn adlewyrchu'r ddarpariaeth iawndal sydd eisoes yn bodoli ar gyfer gwrthod trwydded cwmpo coed sydd eisoes o fewn Deddf Coedwigaeth 1967. Bydd yr egwyddorion a nodir uchod yn cyfrannu at leihau'r tebygolrwydd o achosion apelio ac iawndal.

Egwyddor - Dylai CNC weithio gyda deiliaid trwydded cwmpo coed, gan ddefnyddio'r gallu i gytuno ar ddiwygiadau i amodau, er mwyn lleihau'r potensial ar gyfer iawndal ac apeliadau.

Apeliadau

Mae'r pwerau newydd wedi golygu bod angen ehangu seiliau ar gyfer apêl o dan adran 25 o Ddeddf Coedwigaeth 1967 yn ymwneud â'r amodau ehangach sydd bellach yn gallu cael eu hychwanegu at drwyddedau cwmpo coed, yn ogystal â'r gwahanol gamau o orfodi'r amodau hynny neu ddelio ag ansensitifrwydd annisgwyl gan arwain at niwed amgylcheddol sylweddol. Er bod adran 16 o'r Ddeddf yn dal i alluogi Gweinidogion i gadarnhau, gwrthdroi neu addasu penderfyniad CNC i fod yn destun apêl mewn perthynas ag amodau neu wrthodiad, mae bellach yn bosibl y gall apêl o dan adran 25 fod yn gysylltiedig ag un rhan o hysbysiad yn unig. Diwygiwyd Adran 25 i ganiatáu darpariaeth mewn perthynas â hysbysiadau atal, ond ar gyfer hysbysiadau eraill, dim ond y gallu i gadarnhau neu ganslo'r hysbysiad cyfan sydd gan y Gweinidog.

Egwyddor – Pan fo apêl yn ymwneud â dim ond rhan o hysbysiad sy'n arwain at ganslo'r holl hysbysiad, mae'n fwriad gan Lywodraeth Cymru i CNC ailgyhoeddi hysbysiad addasedig yn unol â chanlyniadau'r apêl. Pan fydd y Gweinidog yn gwneud ei benderfyniad, bydd ef/hi'n ymdrechu i'w gwneud yn glir pa agwedd o'r apêl sydd wedi'i chadarnhau a pha ran sydd heb er mwyn cynorthwyo'r broses hon.

Hysbysiadau Cychwyn

Mae adran wreiddiol 25 (2) o Ddeddf Coedwigaeth 1967 yn nodi bod hysbysiadau a gyflwynir o dan adran 24 yn anweithredol hyd nes i'r cyfnod rhagnodedig ddod i ben at ddibenion apêl h.y. 3 mis. Er bod hyn yn weithredadwy mewn perthynas ag ailstocio, ni fyddai'n ymarferol gohиро'r holl hysbysiadau a gyflwynir am beidio â chydymffurfio ag amodau amgylcheddol neu am niwed amgylcheddol annisgwyl am y cyfnod hwn. Mae'r adran 25(2) ddiwygiedig yn darparu na fydd y cyfnod rhagnodedig hwn yn gymwys i hysbysiadau sy'n atal trwydded cwmpo coed neu sy'n ei hamrywio mewn ymateb i risg difrifol ac uniongyrchol o niwed.

Egwyddor - Dylai CNC ystyried a datblygu canllawiau mewnol ac allanol priodol ynglŷn ag achosion lle nad yw'r cyfnod rhagnodedig yn gymwys gan ystyried darpariaeth ar gyfer apelio ac iawndal sy'n gysylltiedig â'r pwerau newydd.

[diwedd]

Y Gangen Polisi Adnoddau Coedwigoedd,
Yr Is-adran Tir, Natur a Choedwigaeth,
Llywodraeth Cymru